

# LIBER PALESTINN! STOP ISRAEL SO ZENOSID TUTSWIT!

Tulezur lor nu lekran nu truv larme Israel pe masakre Palestinyin dan Gaza – so zanafan, so gran dimunn, so mama-papa, so zenes, so dimunn infirm. Depi 18 mwa nu finn temwayn sa. Li enn zenosid. Larme Israel fors Pal-estinyin dan Gaza ramas tu zot zefe dan motri, deplase ver enn lot landrwa, kot zot res swa anba latant swa dan lakaz deza kraze, lerla re-bombard zot depi avyon lao, detwir zot plantasyon manze, zot bulanzri, zot lizinn, afam zot, blok tu manze, medikaman, fyuel, detrir zot lekol, lopital, sime, zot sistem CWA ek wes-water, zot sistem elektrisite, zot arshiv, zot leta sivil, zot liniversite, zot tu.

## Rol USA

Tusala Israel fer avek benediksyon so alye, Leta Zini. Wi, USA furni so bom, so tenk, so fizi, so misil pu fer sa zenosid la. Tusala Israel kapav fer selman ar larzan e sutyin diplomatik depi Leta Zini. Israel asterla pe afam Palestinyin dan Gaza. Par expre. Tuzur avek sutyin USA, avek sutyin Lerop. Li selman asterla, apre 18 mwa zenosid, ki Lafrans, Gran Bretayn ek Kanada, pe kumans denons Israel pu atosite li pe komet avek inpinite.

Asterla, Israel ek USA finn fek trafik enn espes antite militer degize kuma led imaniter, apel “Gaza Humanitarian Foundation”, ki proteze par enn band mersener Amerikin. Li pe itilize pu sey pyez Palestinyin afame, pu fors zot vinn dan Lesid Gaza pu gayn enn parsel manze, pu lerla, kan zot ariv laba, anpes zot return kot zot. Kan tu konsantre dan bann kan, Israel pu swa exterminn enn parti par kontinye avoy bom lor zot, swa devid zot tu depi Palestinn net. E zot apel sa “deplasman volonter”. E lerla Prezidan Trump pu kapav fer so proze “Mall” prive pye-dan-lo dan Gaza, vande pu enn profi, kuma li ti anonse.

Alor kisannla antor?

Premye: Leta Israel.

Egalman kupab: USA.

Zis deryer sa 2 pei la, ena preske tu pei “Loksidan”, akumanse par UK, Lalmayn, Lafrans, ki konplis dan mil fason kriminel.



## Ekrulman Israel, e osi USA

Li vre ki Israel pe detrir li-mem kuma enn leta, anmemtan ki li pe aneantir Palestinn, Liban, e asterla Lasiri osi. E li ule ris Leta Zini ar li pu atak Liran. Tulezur, li mete-em chula. Li vre, osi, ki Leta Zini enn lanpir ki lor rebor falez so prop bankrut. Tulde fini ekrule net anterm kredibilite. Zot ostrasize dan lemond. Me, sa 2 ekrulman la, Israel ek Leta Zini, pa pe vinn ase vit pu sap Palestinyin, ni dan Gaza, ni dan West-Bank. Amwin, nu tu azir ....

Ki bizin fer? Ki nu kapav fer? Eski u pu donn kudme?

## Fer nu Guvernman azir

- Ramgoolam bizin inskrir Leta Moris dan ka ICJ ki Sid Afrik inn loze kont Israel pu zenosid.

- Guvernman bizin kup tu lvin ar Israel – diplomatik, ekonomik, turistik, kiltirel, sportif, tu.

Deza Moris ti al depoze divan ICJ dan ka ki finn ranport laviktwar kont Israel pu so lokipasyon ilegal Palestinn. Me, fek-la nuvo Guvernman pa finn reponn prezan pu depoze divan ICJ kont Israel so “leta desyez” ki pe afam Gaza, fer li vinn

enn “kan konsantrasyon” total. Pur-tan nom Moris ti figire lor azanda. Moris pa finn sumet argimantasyon ekrit, nonpli. Fode nu fors nu Guvernman azir. Nu pa’le disan Palestinyin inosan lor nu lame dan sa lalit dekolonizasyon la.

## Azir nu-mem

Ki nu pe fer, e pu fer, nu-mem dan LALIT ansam ar lezot lorganizasyon dan enn fron komin? Kontakte nu pu pran pozisyon, pu zwenn dan aksyon.

- Petisyon.

- Manifestasyon.

- Let uver.

- Al Palestinn an-personn. Ena enn linisyativ mondyal pu fer enn grup, marse, rant dan Gaza pu kas leta desyez ki Israel finn mete lor Gaza.

- Boykot tu prodwi e konpayni ki ena lvin ar Israel. Kumans par boykot sipermarse Carrefour, ki ena lvin for ar Israel dan moman zenosid la. Pa met lipye dan sa sipermarse la – ziska li kup so lvin. Al lor sayt muvman Palestinyin apel “Boycott, Disinvestment and Sanctions” pu detay.

## Ki u kapav fer?

Kontakte nu pu rant zwenn dan SOMALP, Solidarite Morisyin ar Lep-ep Palestinn e pu zwenn nu Fron Komin ki pe anmemtan lite pu ferm baz Diego Garcia, ki pe servi par USA ek Israel pandan zenosid la.

*Rada Kistnasamy,  
pu LALIT, Ragoo Lane, Bambous.*

29.05.2025

Tel: 57820094

LALIT li manb dan enn Fron Komin kont zenosid e pu ferm baz Diego ar 20 lezot lorganizasyon: MLC, FPBOU, CTSP, NTUC, FCSOU, GWF, FTU, RPIAWU, RGEA, RWE, Nurses’ Union, Nursing Association, UPSEE, LPT, Idrice Goomany Centre, Leve Fam!, MLE, ABAM, Never Again-Olive Resistance, GTU.

**VIZIT NU WEBSAYT**  
**www.lalitmauritius.org**

fb: lalitmauritius

## LAKOR SIYNE ANT UK EK REPIBLIK MORIS LOR CHAGOS EK DIEGO – SO LINPORTANS EK SO DANZE

Lakor ki fek siyne ant Premye Minis Ramgoolam, avek akolad tu so Minis ek Depite, ek Sir Keir Starm-er, li reprezant enn sertin progre, me li konport buku danze osi. Progre se BIOT, sa koloni Britanik forme an 1965, finn aboli. Tan mye!

LALIT ti ena rezon pu mintenir ki leta Moris ena suvrennte. Asterla UK ek USA fini siyne kumkwa sa li vre. E natirelman, nu selebre avek Chagosyin ki zot nepli totalman bani depi Chagos. Interdiksyon to- tal finn leve. Me. Enn gran “me”. Sak devlopman lor Chagos, mem lor Peros ek Salomon, li pu tuzur bizin lotorizasyon Britanik, e anfind-kont Lamerik. Moris bi- zin fer enn analiz lor lefe “sekirite” pu baz Amerikin nerport ki sanzman, pa zis lor Diego, me lor tu lil, e fer sa traverse dan enn komite konzwin kot UK, e osi USA, syeze. Li enn prolongasyon okipasyon militer pu ankor 100 an. 100 banane! E li enn antrav ar Trete Nasyon Zini apel “Pelindaba” ki asire ki pena zarm nikleer dan Lafrik ditu. Sa Lakor ki Ramgoolam inn siyne re-met sa trete baynding la an-kestyon

## PREMYE SKANDAL NUVO GUVERNMAN – ASHOK SUBRON SO “SISTEM” PU FER NOMINASYON

Guvernman Ramgoolam so premye skandal, li otur Ashok Subron so fason uver aplikasyon ofisyel pu manb Bord NEF, e lera met dibut enn lekip manb so parti pu fer seleksyon! Dan LALIT, avan li kite 20 an desela, nu ti deza gayn lager ar Subron pu so mank prinsip. Par exanp, li ti ule pran enn pursantaz larzan konpansasyon travayer DWC, gard sa dan enn fon. Li imoral fer sa. Alor, lager ti leve kont li dan LALIT. Li finn retrakte vit.

Plitar, li ti propoz enn espes “bord” ki pu fer “proze” pu enn seri lorganizasyon, lera kan kas rantre, sa “bord” la pu ankes li, distribye kas. Sa osi, li enn zafer napa fer. La osi, lager leve. La osi, byin vit, li retir propozisyon la.

Li ti osi ule santraliz ladres ek kontak telefonn pu manb diferan lorganizasyon, inklir LALIT, dan enn sel databeys. Me, li pa etik sa. Ankor enn fwa, lager leve, li retrakte.

Dan dernye 20 banane, depi li kit LALIT sa tandans dan Ashok Subron finn agrave kan li dan ReA. Alor, nu pa etone par so demars farfeli dan “so” Minister, kot li krwar manb Rezistans kapav fer nominasyon Bord NEF, kan Minister Sekirite Sosyal uver aplikasyon.

## KI BIZIN VEYE DAN BIDZE?

Premye Minis Ramgoolam ki osi Minis Finans pe prezant Bidze 2025-26 le 5 Zin. Apre eleksyon 2024, guvernman “Changement” finn etal letandi koripsyon debride e dilap- idasyon fon piblik su ansyin rezim Jugnauth. Sa li vre. Me li pa explik letandi ek rasinn kriz ekonomik ki nu pe fer fas. Se kapitalis ki kontrol lekonomi e se li ki responsab pu kriz ekonomik ki li onivo nasyonal u mondyal. Dan sa 15-20 an- la, kapitalis isi finn gayn enn seri gro konsesyon tax ek sibvan- syon, inklir par milya depi MIC. Sistem tax ki amenn reveni dan bidze, li inzis. Olye taxe kapitalis, se klas travayer ki sarye fardo sa bann konsesyon tax ek sibvansyon a kapitalis.

Alor se avek sa pwin-de-vi-la ki nu bizin get bidze. E anmemtan nu pu bizin gete ki pena dan bidze.

### Eski bidze Ramgoolam pu ogmant prodiksyon alimanter?

Isi, kuma buku pei lemond, kapitalis finn drastikman di- minye investisman dan prodiksyon reyel. Zot prefer rant dan biznes finansye – enn espes biznes kazino ki baze lor spekilasyon. Parey kuma sa lot biznes kot kapitalis pe met so kapital: biznes fonsye. Savedir biznes kot tablisman bayant bon later agrikol, plank terin golf ek morl, plank vila- de-lix dan proze IRS, RES, PDS e vann zot lor marse inter- nasyonal. Leres later agrikol pe servi pu plant kann, prodir disik, mem pena lavenir aköz pri disik pe bese. Aköz pa pe servi later pu prodiksyon alimanter lor gran lesel, pe bizin inport 80% seki nu manze. Parski pa pe devlop nuvo sekte alimanter ki pa pe kree anplwa stab par milye. Rupl finn de- presye. Depi 2014 ziska zordi, rupl finn perdi 46% so valer, e devalyasyon rupl pe kontinye mem. Tusala explik kifer pri, sirtu pri manze ek lezot neseseite pe kontinye monte fles.

### Ki bizin gete kan bidze vini?

Eski pu ogmant tax lor klas kapitalis ek seki pli ris? Uswa eski klas travayer pu kontinye pey TVA e sarye fardo kriz ekonomik?

Eski bidze pu ogmant anplwa dan sekte piblik inklir pran dimunn dan departman lasante? U Non?

Eski bidze pu amelyor servis sosyal inklir sistem pansyon iniversel? Ubyin atak li?

Eski bidze pu kree lozman Sosyal par 40 milye kuma bizin?

### Veye seki PENA dan Bidze!

Lontan, bidze ti moman kot guvernman ti desid lor oryan- tasyon politik ekonomik ki li truv nesaser. Zordi zur, se kap- italis ki dikte politik ekonomik. Pu guvernman kuver pu sa, bann pli gran mezir pu favoriz kapitalis e mezir ki atak klas travayer pa nesaserman vizib dan diskur bidze. Guvernman kasyet zot dan enn seri lalwa ek regleman kuma “Finance Act” ek lezot lalwa tut long lane. Alor bizin vizilan an-permanans.

[Sa lartik la ti sote lor montaz dan trak orizinal ki ti distribye Vandredi 30 Me dan diferan lagar.]

## Ka manb LALIT Lindsey Collen lor Sitwayennte – Viktwar dan Letap Legal

Depi pre trwa zan, LALIT pe mobiliz dimunn pu sutenir ka Lindsey Collen ki chalennj lalwa Pravind Jugnauth ki akord Premye Minis puvwar ras sitwayennte ar Morisyin par maryaz, san okenn ni rezon ni rekur. Alor, premye viktwar li lefet ki buku dimunn kone lor sa lalwa la atraver sa mobilizasyon la. Dezyem viktwar, nu finn gayn enn zizman kumkwa enn individi kapav fer enn tel ka (ena locus standi). E, trwazyem se nuvo Guvernman “Changement” finn pran langazman dan Lakur Siprem le 23 Me ki li ena lintansyon amand sa kloz ki LALIT pe chalennj. Alor, LALIT finn retir so ka. Me, lalit kontinye